



MAthias natus est in oppido Albona, quod ab albedine soli apud Illyricos nomen accepit, circiter annum millesimum quingentesimum uicesimū, ex plebeia sed ueteri & numerosa Flacciorum familia. Patrem habuit Andream Flaccium, matrem uerò Iacobam ex nobili Luciorum familia oriundam. Licet autem is extra Germaniæ fines natus sit, tamen cum à iuuentute apud Germanos uixerit, atque ea lingua aliquot libros ædiderit, suaq; constantia & eruditione Germaniam plurimū exornarit, non immeritò quoque inter Germaniæ illustres uiros recensere placuit. Erat autem Mathias præclara indole præditus.

itaq; pater ipsum literis uacare uoluit, atq; prima rudimenta docuit, cum & ipse ad uirilem maturitatem in bonis studijs incubuerit. Cum autem pater anno Mathiæ 12 obisset, ipse quoq; (ut plerunq; fieri solet) à tutoribus aliquandiu neglectus fuit. Verum ætate crescente ad literas rediit, atq; in patria Francisco Ascerio Mediolanensi præceptore usus fuit. Postea Venetias accedens Ioannem Baptistam Egnatium bonas literas iuxta forum D. Marci profitentem audiuit.